

三怡堂叢書

紫山大全集

五二

三怡堂叢書

卷之六

七

紫山大全集卷四

三怡堂叢書

元 胡祇遹 撰

七言古詩

昊天觀羣鶴圖歌

并序

晉祠之北五里山曰龍山山嶺有觀曰昊天殿閣
金碧松檜陰森行人望之如在半空翠嵐晴潤白
雲晚閒鐘磬步虛之聲散落人間實爲國祈天永
命之福地也竊嘗思之敬鬼神事天地齋潔嚴肅
誠一虔恭之心人皆有之然不擇其地雜于闐闐
市井之間雞犬聲跡之外明神鑒之亦莫之臨若

昊天觀之地靈境勝高爽幽寂超出塵表宜乎百
靈之降集羣仙之游歷也至元十三年清明後三
日羣鶴自西南來翔舞於壇墀飛鳴於殿墀前後
頤頤各有行列移時方相率衝雲表入碧虛由東
北而去河東士大夫賦詩成巨軸道士以爲瑞應
繪圖請序其端仍隨例韻語以歌之

龍山昊天萬壽宮棟宇直欲摩蒼穹塵世殿閣非所同豈
徒眩目誇青紅寶香牕戶含天風簷牙朝暮白雲封霧迷
松逕不可通仙境豈許人力窮人間時得聞磬鐘祥霏瑞
靄常濛濛乘鸞翥鳳度碧空仙輶神駕相迎逢召公近奏

平南功萬方賀表如山崇神人咸和喜時雍羣仙集慶忻
相從萬鶴翔舞空明中法官嘉宴不忽忽移時雲影廻仙
蹤吾皇萬壽居九重四海爲家金爲墉仙翩歲歲來朝宗
又題六鶴圖

心非清泉白石姿掌上丹砂亦徒施高情愈遠愈難寫世
無薛稷誰瑕疵常觀庸筆寫真李太白塵顏俗狀軒昂眉
目何異醉飽屠沽兒九臯清唳勞我思觚哉觚哉鳳兮鳳
兮奚止於是堪嗟咨

農器嘆寄呈左丞公

夜宿田家耿無寐窓下主人長嘆喟歎聲未絕還獨言言

切音哀復歔歔國家敦本知愛農特設大司專保惠分司
勸諭立課程朝送農官暮迎吏誠言諄諄不敢忘榜示門
墻加勉勵小民衣食在田畝孰願飢寒仍負罪火雲赤日
汗流土月落參橫手扶耒趨時投種惜雨乾泥淖耘苗恐
荒穢繭絲租調僅供辦衆口嗷嗷憂卒歲火燒炕暖代衾
裯藜藿何嘗識鹽味農家辛苦感國恩農具依前俱勿稅
木根損鏵石損犁取與鄉鄰不難置行商到門問有無粟
麥絲麻相換易有時負價卒莫償累月經年不嘆悲農人
種田爭寸陰農器易求無止滯年來貨賣拘入官苦窳偷
浮價增倍賣物得鈔鈔買鏵又憂官局遲開閉入城最近

百餘里數日遲留功漫費耕時不幸屢破損往返勞勞凡
幾輩往來勞苦不憚煩一刻千金惜虛廢欲於農隙多置
買粟帛無餘百無計農官農官助我耕何異奪薪催釜沸
一鐺廢奪十農功辦與官家多少利勞形餒腹死甘心最
苦官拘賣農器

捕蝗行

并序

至元六年北自幽薊南抵淮漢右太行左東海皆
蝗朝廷遣使四出掩捕僕奉命來濟南前後凡百
日而絕故作是詩

老農蹙額相告語不憚捕蝗受辛苦但恐妖蟲入田中綠

雲秋禾一掃空敢言數口懸饑腸無秋可以實官倉奚待
里胥來督迫長壕百里半夜掘村村溝塹互相接重圍曲
陷仍橫截女看席障男荷鋤如敵強賊須盡殺鼓聲摧撲
聲不絕暈死豈容時暫歇枯腸無水煙生舌赤日燒空火
雲裂汗土成泥塵滿睫上下杵聲如搗帛一母百子何滋
繁聚如羣蟻行驚湍嘉穀一葉忽中毒芄芄枝榦皆枯乾
無乃民勞更無德可能一郡俱貪殘廟堂調燮亦有道何
爲凶孽來相干聖躬愛民夜坐起遣使日馳三百里太宗
吞蝗那可比願隨時雨俱爲水誰憐粒食誠艱食螟螣
賊口中得土戰勤勞血戰憂田家一飽豈易求今冬斗粟

直三錢力迴凶歲成豐年公私倉廩兩充盈大車小車輪
邊兵

後捕蝗行

飛蝗撲絕子復生脫卵出土頑且靈有如巨賊提羣朋羣
止卽止行則行過坎涉水不少停若奔期會趨遠程開林
越山忘險平倍道夜走寂無聲累累禾穗近秋成利吻一
過留枯莖生機殺機誰控衡強梁捕取理亦明深塹百里
中有坑投軀一落不可升億萬鋪杵敵汝勅肝腦塗地如
邱陵行人兩月增臭腥咄哉妖蟲竟何能火雲赤日勞羣
氓

征戍歎

吁嗟兵制胡不均富室益富貧益貧百丁萬畝不介胄重
以高爵榮其身鞭笞卒伍等徒配暴橫刺刻誰爲真兩楸
茅屋一孤影妻子寒餓常酸辛終年應役欲誰代窮邊刁
斗昏復晨樞府哀憐立新法三家兩家爲一門終竟富不
與貧偶扶持支助徒虛文困弱相依日詞訟祇與案牘供
錢緡病亡逃代姦百出勘會保結何紛紛一兵征行一走
送征人甘分嗟農民長途往返少違限追呼撻箠連比鄰
積年逋竄不可復官吏負罪眉亦顰我無長策拯斯弊執
筆判署空憂勤

趙仲器治古齋

古人制器藏妙趣立法取象非徒爲精堅密緻乃餘事象
以形著義理隨斷耜操耒取諸益網罟生自明兩離剡舟
剡楫風水渙弦弧鏃矢火澤睽器成借力百工手其原聖
哲勞深思嘗觀博古圖至理誰復推夏金鑄禹鼎萬怪不
可欺湯盤及周敦形模亦多儀文章昭欵識一一垂誠辭
備物薦郊廟格天神地祇寶藏遺後嗣百世咸宗師唐王
踐阼受冊命東房西序何輝輝秦漢而下不遵古詭形怪
狀逐意移浮華苦竄求悅目工不信度隨我宜朝嗟觚不
觚暮嘆匱非匱千將鏤鄒聽呼索翻以古人爲拙癡下不

順物性上不循天時巧互凌跨小智爭自私隨成復隨
敗所費恒不貲周官考工篇迂濶何足規嗚呼器尙如
此禮樂刑政良可知鐘鏞誰復辨滄漚擊石拊石從高卑
偶因制器傷世變書作冶古齋中詩

和婁參議詩韻

困趨迎厭奔走對鏡茫然慚皓首正爾無物洗惡懷百韻
新詩得元九薔薇佳酒清滿壺珍重相邀一開口下榻拂
凝塵卻掃享敝帚人生會合難多奇而少偶我思見君莫
逆交君亦期予歲寒友風期相合不易得一笑一談寧肯
負把臂細論文舉白豪吸酒忘形到爾汝苛禮不煩守玉

織瓊甲送觴來籌合新歡閒袖手鱗脯鮑酥厭八珍肴藪
雜陳集山藪餘馨剩馥飽童僕白飯青芻及馬狗兀然一
醉百念銷人間萬事無所有晉賢誠達人飲不論石斗豈
不自貴重誰與辨禾莠潘岳一縣花陶令五株柳趣向既
已定百欲不可誘曾次自涇渭口不出臧否花梢紅日上
東軒竹影清風來北牖山鳥山花吾友于鶴唳猿吟和呼
吼家奴種麥供糟牀取足何須論百畝拘囚笑謝國中人
放曠願同林下叟青田飛白鷺了不受塵垢肆志輕世懷
肯以事掣肘歲穰歲凶儘百年不貪寅卯憂申酉雨足竹
生孫霜餘芋依母舉觴醉先酒稷爲百穀后道興羞爲李

賀詩招擢腎腸心欲嘔笑傲得此生乘化從老朽自知乍
可爲雞先附尾那能作牛後琴書及妻子攜抱從左右欲
眠卽過午思起何礙丑漁竿與耕鋤自視等章綬柴關晝
掩無俗客雞犬依依成牝牡貧賤如磐誠自樂富貴浮雲
非我厚坐憐門外趨迎者婢膝奴顏競妍醜道亦非吾道
耦亦非吾耦多君高志出冥鴻駟馬千金還弗受歸來暇
日理田園菽粟豐穰積山阜牀頭時自釀佳醪笑會賓朋
享期壽末患莫知心匪石歲寒後知松柏久

送張子政

君不見蕭何乘時起刀筆漢室開基功第一長才變化蛇

作龍安敢區區較前趾身名勲業合俱高滿眼黃金同瓦礫古人居官長子孫後人防下如防賊三年轉官復轉吏誰議姦生由法出法益精嚴情益偷治罪何如先養德丈夫此身當自重悖得到頭如順失誠君廉慎繼公勤邪正邇來分白黑松植蓬蒿易出羣木從繩墨何勞直簿書奚足老英雄舉首鳳池何咫尺

送孫伯淵

衰老無事門常扃扶杖起應敲門聲續孫二子來告別往應吏部三呼徵人才自古應世出山公啟事今公平不才廢黜能者進細不爲桷大爲桷妍醜詎可逃明鏡重輕未

易欺權衡不患無位患難立二子素有廉幹稱但秉赤心
思報國何憂不作貴公卿

贈劉講師

靈臺山下虛程觀主人劉姓字子真年登八十益強健道
氣益盛煙露身鄰家井深二百尺鑿井得水如有神忘形
絕學鍊精魄千年要作羲皇人松牕夢起笑人世蚍蜉擾
擾爭紅塵有時隨俗入城市落花飛絮長安春嗟予本井
聲利士常懷漉酒淵明巾急流勇退會當遂杖履徑謁清
渭濱

贈默庵邢仙翁

默庵仙翁吾不識趙侯作傳求詩什仙翁高年今幾何童齒黃冠今八十無事經年不到城有脅平生不沾席養虛寥寥入至虛調息綿綿作胎息黃精肥甘松子香腐臭人間煙火食厭聞世上海飛塵飽見巖前松化石每將螻蟻等王侯直以春秋比朝夕迴頭俯視長安城哀死榮生幾歌泣

題所翁雙龍戲珠圖

黑雲湧海雷破山兩龍出沒煙波間不思崇朝雨天下一珠爲戲何癡頑所翁何處得此態三生海賈知妖姦澤能及物尙乃爾蛇蝎豺狼虎豹磨牙吮血口舌宜瀾翻